

Evening Dogri News Bulletin

11 January. 2026 .18:15 Hrs

Headlines

- प्रधानमंत्री नरेंद्र मोदी होरें देशवासिएं दा आह्वान कीता ऐ जे ओहू देश गी बंडुने दी भैड़ी मंशा आहली ताकतें दे खलाफ इकजुट रौहन।
- मुखमंत्री उमर अब्दुल्ला होरें खेलो इंडिया बीच गेम्स.2026 दुरान पैनचक सिलाट च कुल 5 तगमे जित्ते ते मर्दे दी श्रेणी च जेत्तू रौहने लेई जम्मू-कश्मीर दे दस्ते दी सराहना कीती ऐ।
- कब्जा रेखा ते अंतरराष्ट्री बन्ने पर निगरानी होर बधाई दिती गई ऐ, अखनूर सैक्टर दे अगेत्रे ग्रांऽ खड़ाह च संदिग्ध कबूतर फगड़ेआ गेआ ते इस मामले च जांच जारी ऐ।
- 7एं दिनें तोड़ी बंद रौहने मगरा ऐतिहासिक मुगल रोड गी गड्डियें दी आओजाई लेई फही खोली दिता गेआ ऐ।
- कठुआ दे डिप्टी कमिशनर होरें जिले च जारी बंकरें दे निर्माण कम्में च हासल प्रगति दा जायजा लैता।

<><><><><><>

PM Unity

प्रधानमंत्री नरेंद्र मोदी होरें देशवासिएं दा आह्वान कीता ऐ जे ओहू इकजुट रौहंदे होई देशै च बण्ड पौआने आहली ताकतें गी शिकस्त देन। उनें आखेआ

.....

अज्ज गुजरात च सोमनाथ स्वाभिमान पर्व दे मौके पर इक बड्डी जनसभा गी संबोधित करदे होई प्रधानमंत्री होरें देशवासिएं गी आग्रह कीता जे ओहू अपने इतिहास कन्नै जुडे दे रौहन ते विकसित भारत दे लक्ष्य गी हासल करने लेई मूंडे कन्नै मूंडा मलाइयै ते दिल कन्नै दिल मलाइयै लगातार अगगे बधदे रौहन। सोमनाथ स्वाभिमान पर्व गी देशवासिएं दी शाश्वत आस्था ते भक्ति दा इक प्रतीक करार दिंदे होई प्रधानमंत्री होरें आखेआ जे एहू उत्सव छड़ा

स्हाडी एतिहासिक शान दा जश्र मनाने दा मौका गै नेई ऐ, सगुआं एहू देशै दी परम्पराएं गी अगगे बधाने ते भविक्ख गी मजबूत बनाने लेई बत्त पदरी करने दा मौका बी ऐ।

<><><><><><>

CM-Pencak Silot

मुक्खमंत्री उमर अब्दुल्ला होरें खेलो इंडिया बीच गेम्स-2026 दरान पैनचक सिलाट च सुन्ने दे दो तगमे सने चांदी दे बी दो तगमे ते इक्क कैंऽ दा तगमा जित्तने ते मर्दे दी श्रेणी च जेतू रौहने लेई जम्मू-कश्मीर दे दस्ते दी सराहना कीती ऐ। उमर होरें आखेआ जे एहू उपलब्धियां मकामी खडारिएं दी निश्ठा गी दर्शादियां न ते जम्मू-कश्मीर च खेडें सरबंधी खेत्तर गी लगातार थहोआ करदी मजबूती दा बी सबूत न।

<><><><><><>

IB-Vigilance

बन्ने पारा थमां तस्करी दिएं केई सारी घटनाएं दे सामने औने दे मद्देनजर सुरक्षाबलें, अंतरराष्ट्री बन्ने ते कब्जा रेखा पर सतर्कता होर बधाई दित्ती ऐ। आकाशवाणी दे जम्मू संवाददाता दी रिपोर्ट मुजब, इस गैंऽ दा मकसद बन्ने दी सुरक्षा गी निगगर करना ते घुसपैठक जां फही संघर्ष विराम उल्लंघना दी कुसै बी माड़ी घटना गी नाकाम बनाना बी ऐ। तोआई, कब्जा रेखा दे नेडे अखनूर सैक्टर दे अगेत्रे ग्रांऽ खड़ाहू च इक संदिग्ध कबूतर फगड़ेआ गेआ जेह्दे पर 'रहमत सरकार' ते 'रिजवान-2025' लिखेआ गेदा हा। हलके सलेटी रंगै दे इस कबूतर गी 13एं ब'रें दे इक मकामी जागतै फगड़ेआ हा। अधिकारिएं मूजब इस कबूतरै दे फंगें पर मुहर लगगी दी ही ते इसी अगड़ी जांच लेई पलांवाला पुलस दे सुपुर्द करी दित्ता गेआ ऐ।

<><><><><><>

Swacch Campaign

जम्मू च जारी स्वच्छ गणतंत्र दिवस अभियान दे इक हिस्से दे तौर पर जम्मू नगर निगम दे कमिशनर डॉ. देवांश यादव होरें जिले दे बक्ख-बक्ख इलाके, जि'आं छत्री हिम्मत, छत्री, त्रिकुटा नगर एक्सटेंशन, बसंत बिहार ते

नानक नगर सने होरनें इलाकें हेठ औने आहले वार्ड नंबर 50, 51, 52 ते 54 दा व्यापक निरीक्षण कीता। इस दौरे दरान डॉ. यादव होरें साफ-सफाई सरबंधी पूरी-पराती स्थिति जि'आं शिड़कें, गलियें, नालियें ते होरनें सार्वजनिक थाहें दी साफ-सफाई दा जायजा लैता। एह्दे अलावा उनें एकडे इलाकें च जारी विकास कम्में च हासल प्रगति दा आंकलन कीता ते मकामी लोकें गी उपलब्ध करवाई जा'रदी सुविधाएं दी बी दिक्ख-सुन कीती। इस मौके पर पत्रकारें कन्नै गल्लबात करदे होई डॉ. देवांश यादव होरें आखेआ

<><><><><><>

Prog. Announcement

आकाशवाणी जम्मू दे प्रादेशिक समाचार एकांश आसेआ कल 12 जनवरी गी राश्ट्री युवा दिवस-2026 दे मौके पर 30एं मिटनें दा इक विशेष कार्यक्रम प्रसारित कीता जाह्ग जेह्दा विशे होग “ अपने आपै गी जागृत करदे होई दुनिया पर अपनी छाप छोड़ना”। इस विशेष कार्यक्रम दा प्रसारण कल संगारें दपैह्नी ढाई बजे कीता जाह्ग ते एह्दे च स्हाडी परौहिनयां होडन जम्मू-कश्मीर प्रशासनिक सेवा दियां वरिष्ठ अधिकारी ते युवा सेवाएं ते खेडें सरबंधी विभाग जम्मू-कश्मीर दिएं महानिदेशक अनुराधा गुप्ता जेह्दियां इस विशे पर अपने माहिराना बचार सांझे करडन। इस कार्यक्रम दी मेजावानी वरिष्ठ समाचार वाचक जगमोहन शर्मा आसेआ कीती जाह्ग। इस चाल्ली दे होर प्रसारणें लेई सुनदे रवो आकाशवाणी समाचार जम्मू मीडियम वेब 303 मीटर यानि 990 किलो हर्टज ते एफ.एम 100 अशारिया 3 मेगा हर्टज पर।

<><><><><><>

Mughal Road Open

माडे मौसमी हालात ते जारी होरनें कम्में दे चलदे पिछले 7एं दिनें थमां बंद पेदी ऐतिहासिक मुगल रोड गी अज्ज गड्डिएं दी आओजाई लेई परतिये खोली दित्ता गेआ ऐ। इस फैसले दी तस्दीक करदे होई मुगल रोड सरबंधी एस.ओ ट्रैफिक अनिल कुमार होरें दस्सेआ जे पिछले दिनें खास करियै पीर गी गली इलाके च बर्फबारी ते तलैह्ट ज्नेही स्थिति बनी दी ही पर हुन शिड़कै गी गड्डियें दी आओजाई लेई बहाल करी दित्ता गेआ। उनें गलाया जे लोकें दी सुरक्षा यकीनी बनाने लेई एहतियात दे तौरा पर पिछले दिनें मुगल रोड पर ट्रैफिक बंद रक्खी गेदी ही। उनें

इ'ब्बी दस्सेआ जे मुगल रोड पर बड्डुलै साड्डे 10 बजे शा लेइयै दपैह्नी ढाई बजे तोड़ी गै गड्डियें दी आओजाई दी खुल्ल दित्ती जाह्गा। उनें आखेआ

<><><><><><>

Kathua Bunker Construction

कठुआ दे डिप्टी कमिशनर राजेश शर्मा होरें जिले दे बन्ने आहले इलाके च बंकरें दे निर्माण कम्में च हासल प्रगति दी समीक्षा लेई इक उच्चि सतह दी बैठक दी प्रधानता कीती। आकाशवाणी जम्मू संवाददाता दी रिपोर्ट मुजब बैठक दरान बंकरें दे जारी निर्माण कम्में दी स्थिति दा आंकलन करने दे कन्नो-कन्नी कम्में च पेश औने आहली रूकावटें दी पंछान करने ते बकाया रौहंदे बंकरें दा कम्म तय समें-सीमा दे अंदर-अंदर सबूरा करने बारै बी चर्चा कीती गेई। ध्यानजोग ऐ जे कठुआ जिले च कुल 717 व्यक्तिगत ते 85 समुदायिक बंकरें सने कुल 802 बंकरें दा निर्माण कम्म हत्थै च लैता गेदा हा जिंदे चा अजें तोड़ी 796 बंकरें दा कम्म सबूरा करी लैता गेदा ऐ। जिले च हुल छडे 6 गै बंकर जेरे-तामीर न जिंदे च इक समुदायिक बंकर ते 5 व्यक्तिगत बंकर शामिल ना।

<><><><><><>

VDC-Training

कब्जा रेखा पर बदधे घुसपैठ दे खतरें गी नाकाम करने ते मकामी स्तर पर सुरक्षा बवस्था गी तगड़ा बनाने दे मकसद कन्नै पुंछ पुलस आसेआ जिले दे संवेदनशील सरहदी इलाके दे नेडे बसे दे ग्रांड सलोतरी झुलास दारा दे बसनीकें ते ग्राम रक्षा समितिएं दी रक्षा लेई इक सिखलाई कार्यक्रम दा सरिस्ता कीता गेआ। एहू कार्यक्रम खित्ते च हाल दिएं सुरक्षा घटनाएं ते खुफिया रिपोर्टें दे मद्देनजर आयोजित कीता गेआ। ध्यानजोग ऐ जे स्याले दी रूतै दरान कब्जा रेखा पर घुसपैठ दिएं भैड़ी कोशिशें च बाद्दे दी शैका दे मद्देनजर इस चाल्ली दे कार्यक्रम बडे महत्वपूर्ण मन्ने जा'रदे ना।

<><><><><><>

10th Datesheet

जम्मू-कश्मीर स्कूली शिक्षा बोर्ड आसेआ जम्मू खित्ते दी समर ज़ोन च 10मी जमात दे म्तेहानें लेई डेटशीट जारी कीती गेई ऐ। एह म्तेहान 17 फरवरी गी शुरू होउन ते 10 मार्च गी सम्पन्न होई जाउन। म्तेहान बडुलै 10 बजे थमां दपैह्नी 1 बजे तगर होग। विद्यार्थिं गी आखेआ गेआ ऐ जे ओहू JKBOSE टी अधिकारिक वेबसाइट <https://jkbose.nic.in/>. पर डेटशीट दिक्खी लैन। बोर्ड नै विद्यार्थिं गी अपील कीती ऐ जे ओहू म्तेहानें लेई पूरी मेहनत कन्नै त्त्यारी करन। बोर्ड नै म्तेहानें गी पारदर्शिता कन्नै करोआने दा बी भरोसा दोआया ऐ।

<><><><><><>

Animal Husbandary Ramban

पशुपालन विभाग आसेआ रामबन जिले च राष्ट्री गोकुल मिशन ते राष्ट्री पशुधन मिशन ज्नेई पैहलकदमिं दे राहें पशुपालन, करसानें दी औंदन ते रोजगार पैदा करने गी बढावा दित्ता जा'रदा ऐ। इस चाल्ली दिं योोजनां तैह्त लाभार्थिं गी रियायती दरें पर दोआर-कर्जे दी सुविधा, माल-मवेशिं च बमारिं दी रोकथाम लेई मदाद ते होरनें बक्ख-बक्ख कम्में ताई बी स्थूलतां उपलब्ध करवाइयां जंदियां न। इनें योोजनां दे पिच्छे दा मुख मकसद उद्यम विकास, पशुधन च बाद्दा ते बक्ख-बक्ख उत्पादे गी संगठित बजारें तगर पजाने च मदाद उपलब्ध करवाना ऐ। इस सरबंध्यै च होर जानकारी सांझी करदे होई पशुपालन विभाग रामबन दे एच.ए.डी.पी मेम्बर जफर इकबाल होरें आखेआ

<><><><><><>